

Tak selesai selagi PBT 'tutup mata'

Kuala Lumpur: Lesen premis dan penjaja yang di 'Ali Baba' kepada warga asing tidak akan selesai selagi ada pihak yang 'tutup mata' mengenainya.

Presiden Gabungan Persatuan Penjaja dan Peniaga Malaysia Datuk Seri Rosli Sulaiman berkata, pihaknya tidak menafikan pembabitan 'orang dalam' pihak berkuasa tempatan (PBT) yang cuba melindungi kegiatan itu.

"Kita tidak menafikan ia ada (orang dalam) tetapi kita tidak membuat tuduhan, jika PBT terutama Dewan Bandaraya Kuala Lumpur (DBKL) mengambil tindakan tegas sudah pasti perkara ini tidak akan berulang.

"Isu ini sudah lama, bukan perkara baru namun kenapa ia gagal diselesaikan? Kita minta PBT seluruh negara terutama DBKL untuk memastikan anggotanya melaksanakan dengan tegas dan betul serta jangan ada 'hanky panky' dan jangan tutup sebelah mata.

"Jika perkara ini terus berlaku ia tidak akan selesaikan masalah, kita tidak menuduh tetapi inilah senario yang berlaku," katanya ketika dihubungi semalam.

Rosli berkata, pihak persatuan tidak akan berkompromi jika ada ahlinya yang memajak atau menyewakan lesen kepada warga asing.

"Kita ada kesan tetapi bila tanya mereka tetap menyalahkan warga asing, mereka dakwa orang tempatan berniaga secara berlesen tetapi menjaja secara haram tanpa lesen dan barang yang dijual lebih murah," katanya.